



CENTAR ZA SIGURNI INTERNET



**Safer
Internet
Day 2026** Tuesday
10 February
Together for a better internet
#SID2026



**MEĐUNARODNI FORUM
SOLIDARNOSTI - EMMAUS**

BOSNA I HERCEGOVINA

Sarajevo, 02.02.2026.

MFS-06-10/26

Predmet: Poziv za učešće i podršku u obilježavanju Dana sigurnijeg interneta u Bosni i Hercegovini, 10. februar/veljača 2026. godine

Poštovani,

u vremenu kada digitalne tehnologije postaju neizostavan dio svakodnevnog života djece i mladih, pitanje njihove sigurnosti u digitalnom okruženju predstavlja zajedničku odgovornost institucija, obrazovnog sistema, roditelja, civilnog društva i privatnog sektora. Dan sigurnijeg interneta, koji se globalno obilježava pod sloganom „**Zajedno za bolji internet**“, pruža važnu priliku da zajedničkim djelovanjem doprinesemo podizanju svijesti o odgovornom i sigurnom korištenju interneta te jačanju zaštite djece u digitalnom okruženju.

Ovaj međunarodni dan, koji se obilježava uz podršku Evropske komisije, već dugi niz godina okuplja relevantne aktere iz oblasti obrazovanja, socijalne i dječije zaštite, medija i telekomunikacija. U Bosni i Hercegovini, na inicijativu **Centara za sigurni internet u BiH¹**, Dan sigurnijeg interneta se od 2011. godine kontinuirano obilježava kroz različite edukativne i promotivne aktivnosti, među kojima posebno mjesto zauzima online edukativni kviz za učenike osnovnih i srednjih škola. Online kviz ima edukativno-takmičarski karakter i osmišljen je s ciljem da djeca, kroz interaktivan i njima prilagođen format, steknu znanja i vještine potrebne za prepoznavanje rizika i zaštitu u digitalnom okruženju. Tokom obilježavanja **Dana sigurnijeg interneta 2025. godine, u kvizu je učestvovalo više od 29.600 djece i mladih**, dok je poruka o sigurnosti na internetu putem prateće kampanje dosegla više od milion građana. Od početka obilježavanja Dana sigurnijeg interneta u Bosni i Hercegovini, više od 158.000 djece i mladih steklo je znanja o sigurnom korištenju digitalnih tehnologija uz podršku Centra za sigurni internet. Imajući u vidu značaj ovih aktivnosti i njihov direktan doprinos prevenciji zloupotrebe djece i mladih u digitalnom okruženju, ljubazno Vas pozivamo da podržite i učestvujete u obilježavanju Dana sigurnijeg interneta 2026. godine, te na taj način doprinesete jačanju sigurnijeg i odgovornijeg digitalnog okruženja za djecu i mlade u Bosni i Hercegovini.

Dan sigurnijeg interneta 2026 (SID 2026) obilježit će se pod sloganom „Zajedno za bolji internet“ dana 10. februara / veljače 2026. godine, kroz realizaciju popularnog online edukativnog kviza za djecu i mlade.

Online kviz će biti aktivan isključivo na navedeni dan, u periodu od **09:00 do 19:00 sati**, nakon čega će sistem aplikacije za online takmičenje automatski generisati pobjednike kviza među učesnicima koji su tačno odgovorili na **80% ili više pitanja**, te objaviti informacije o pobjednicima i osvojenim nagradama. Svi pristupi kvizu bit će kodirani, a u cilju zaštite ličnih podataka djece, pobjednici će biti objavljeni isključivo pod jedinstvenim kodom, uz navođenje škole pobjednika, na online platformi Centra za sigurni internet u Bosni i Hercegovini, kao i putem zvaničnih društvenih mreža Centra.

¹ Centar za sigurni internet u Bosni i Hercegovini je uspostavljen u okviru inicijative „Zaustaviti nasilje nad djecom: Prevencija i rad na sprečavanju seksualnog iskorištavanja i zlostavljanja djece u digitalnom okruženju u Bosni i Hercegovini.“ Svrha inicijative je prevencija nasilja nad djecom u digitalnom okruženju kroz podršku vlastima, institucijama i profesionalcima u Bosni i Hercegovini da unaprijede postojeće i razviju nove mehanizme rada i zaštite.

Kako bi se i ove godine osiguralo što veće učešće djece i mladih u takmičenju, te dodatno unaprijedilo njihovo znanje o sigurnom i odgovornom korištenju digitalnih tehnologija, izrađen je promotivni poster za obilježavanje SID-a 2026, s pozivom djeci i školama da se uključe u online kviz. Poster dostavljamo u prilogu, dok su dodatne informacije o događaju dostupne na web platformi www.sigurnodijete.ba, kao i na društvenim mrežama Centra za sigurni internet.

I ove godine obilježavanje Dana sigurnijeg interneta podržavaju partneri i sponzori Centra za sigurni internet, koji su prepoznali značaj zaštite djece i mladih u digitalnom okruženju te su za pobjednike kviza osigurali vrijedne nagrade.

Ovim putem Vas molimo da o obilježavanju Dana sigurnijeg interneta obavijestite učenike Vaše škole, dostavite im poster u elektronskoj formi ili isti postavite na vidnom mjestu u školi, te da na ovaj način podržite aktivnosti u oblasti sprečavanja zloupotrebe djece i mladih u digitalnom okruženju.

Uputstvo za djecu:

**Surfaj Sigurno – Zajedno za bolji internet!
Djeco, pridružite nam se i osvojite vrijedne nagrade!**

Šta trebam uraditi?

- posjetiti web stranicu Centra za sigurni internet u Bosni i Hercegovini www.sigurnodijete.ba i upoznat se sa sigurnim korištenjem interneta;
- dana 10. februar/veljača 2026. godine od 09:00 - 19:00 sati, posjetiti web stranicu www.sigurnodijete.ba i registrirati se za kviz koristeći svoj jedinstveni kod pristupa;
- zabilježiti svoj jedinstveni kod pristupa kvizu;
- riješiti kviz pitanja o sigurnom korištenju interneta;
- osvojiti jednu od vrijednih nagrada!

Unaprijed se zahvaljujemo i radujemo nastavku uspješne saradnje.

S poštovanjem,



Centar za sigurni internet u Bosni i Hercegovini